

四庫全書

集部

欽定四庫全書

集部

宋文鑑卷三十一

詳校官監察御史臣劉湄

助教臣常循覆勘

總校官降調編修臣倉聖脉

校對官中書臣牛稔文

謄錄監生臣劉翰周

欽定四庫全書

宋文鑑卷三十一

宋 呂祖謙 編

詔

幸西京詔

盧多遜

定鼎洛邑我之西都燔柴秦壇國之大事况削平江表
底定南方惟率土之混同自上天之鑒祐內慙涼德感
是洪休得不罄以恭虔申其告謝睠惟京而西顧兆陽

位於南郊豆籩陳有楚之儀黍稷奉惟馨之薦朕今暫
幸西京取四月內選日有事於園丘宜令有司各揚其
職禮容儀衛典故在焉祇事肅成無或煩擾諸道州府
不得以進奉為名輒有率斂凡在中外當體予懷

祖宗升配詔

宋 綬

朕聞王者奉宗廟貴功德禋天祀地則有侑神作主之
尊審諦合食則有百世不遷之重朕以寡薄獲承天序
實賴先烈沆臻治平懼不能揚祖宗之休丕顯懿鑠夙

夜惟念弗遑寧居恭以太祖皇帝奮淳耀之精輯樂推
之運屬五代澆季中華剖裂英威一震罔不率俾夷僭
黜暴皇綱再張革其桀驁納諸軌度規摹閎遠貽萬世
法太宗皇帝躬盛聖之資乃膺繼體及來閩粵復汾晉
方夏一統尉侯萬里興文教拔羣材思皇政經憂勞庶
務惠澤漸漬浹人骨髓眞宗皇帝欽明孝熙恢績鴻緒
勤儉以率下哀矜以謹刑撫和二邊兵不復用民靡知
役物遂其生因時昭泰憲章考古登封巡祭聲明焯耀

享國多載仁恩溥博昔商周之際則長發大禘嚴父配
天逮於漢氏亦能尊二宗立廟樂朕甚慕之肆我藝祖
之受天命建大業可謂有功矣二聖繼統重雍累洽可
謂有德矣其令禮官稽按典籍辦崇配之序定二祧之
位中書門下審加詳閱稱朕意焉

賜中書門下詔

歐陽修

朕纘承丕基撫有方夏謂教之不可以家至而行之每
務於身先惟是儉勤敢忘勉勵期與羣庶臻於富康而

人殆久安驕於佚欲物豐太盛耗以浮虛苟奉養以自
私忘僭奢之為戾士民交黷貴賤靡分惟其彊力之能
無復等威之制考於著令雖有舊章顧在攸司鮮聞用
法民遂安於常習弊罔革以滋深紀綱既紊於度程風
俗以至於流蕩俾朕有欲治之意不能副余之誠心而
民多自陷之愚未免煩余之訓導夫令信由於貴始下
化先於上行眷予一二之臣其率庶工而警職俾爾多
方之衆勿踰常憲

一作

法以干刑庶漸革於侈風以共趨

於治路凡居室之制器用之度冠服之章妾媵之數其
令中外臣庶遵守前後條詔如有違犯仰御史臺及開
封府糾察聞奏其諸路州軍即委轉運使提點刑獄臣
寮及逐處長吏施行布告中外咸使聞知

皇太后還政議合行典禮詔

歐陽修

朕頃以嗣承大統方執初喪過自摧傷遂嬰疾恙皇太
后尊居母道時邁家難憫余哀荒俯徇誠請勉同聽覽
用適權宜賴保護之勤劬獲清明而康復恭惟坤德之

至靜實厭事機之久煩殆此彌年荐承諄誨顧寔繁於
庶政難重浼於睿慈然而方國多虞則共濟天下之務
惟時無事亦宜享天下之安先民有言無德不報雖日
以三牲之養未足盡於予心而刑于四海之風必務先
於孝治惟是事親之禮蓋存有國之規當極尊崇以稱
朕意應合行儀範等事令中書門下樞密院參議以聞

通商茶法詔

歐陽修

古者山澤之利與民共之故民足於下而君裕於上國

家無事刑罰以清自唐末流始有茶禁上下規利垂二
百年如聞此來為患益甚民被誅求之困日惟咨嗟官
受濫惡之入歲以陳積私藏盜販犯者寔繁嚴刑峻誅
情所不忍使田間不安其業商賈不通於行嗚呼若茲
是於江湖間幅員數千里為陷穽以害吾民也朕心惻
然念此久矣間遣使者往就問之而皆謹然願弛榷法
歲入之課以時上官一二近臣件析其狀朕嘉覽於再
猶若慊然又於歲輸裁成其數使得饒阜以相為生刻

去禁條俾通商賈歷世之弊一旦以除著為經常弗復
更制損上益下以休吾民尚慮喜於立異之人緣而為
姦之黨妄陳奏議以惑官司必寘明刑用戒狂謬布告
遐邇體朕意焉

求直言詔

韓維

朕涉道日淺暗於致治政失厥中以干陰陽之和乃自
冬迄春旱暵為虐四海之內被灾者廣間詔有司損常
膳避正殿冀以塞責消變歷日滋久未蒙休應嗷嗷下

民大命近止中夜以興震悸靡寧永惟其咎未知攸出
意者朕之聽納不得於理歟訟獄非其情歟賦歛失其
節歟忠謀讜言鬱於上聞而阿諛壅蔽以成其私者衆
歟何嘉氣之久不效也應中外文武臣寮並許寔封直
言朝政闕失朕將親覽考求其當以輔政理三事大夫
其務悉心交做成朕志焉

賜中書門下置寶文閣學士待制詔 張方平

昔我藝祖神武不殺誕昌寶祚太宗修文德以光大業

眞宗崇儒術以承休命仁宗善繼謨烈化成治定咸有
述作煥於簡編河漢昭回奎壁相照迺規層構邃在西
清上憲帝藏書之府章累朝稽古之盛並揭嘉名以登
峻望俾服凝嚴之職因為咨訪之地誠聖哲之遠業熙
洽之高致也仁祖升遐先皇纂御首命近列論次遺文
鈿軸寶函未終繙錄白雲紫氣遽復上賓今告畢功甫
將安奉大訓九歌之重垂世共長廣內祕室之藏貽謀
無極祇循故事適成先志寶文閣宜置學士待制著於

令

禁內降詔

胡宿

朕紹承駿烈祇服先猷蹈道以臨庶邦慎憲而持大柄
馭之子奪正以賞刑悉任至公靡容紊法比有儉幸肆
興妄圖或違理覬息或負罪希貸率求內出間亦奉行
蠹政虧風莫斯為甚雖屢頒於詔約曾未絕於私祈兼
慮臣庶之家近貴之列交通請託巧詐營為陰致貨賕
密輸珍玩寅緣結納侵撓權綱方務澄清當嚴禁詰儻

復違犯斷在必行重念成湯以六事責躬女誦苞苴之
先戒管氏以四維正國禮義廉恥之具張矧宗祀之涓
成屬祥釐之均被嘉與中外絀此非衰勉於自新以隆
至治今後應內降指揮特與思澤及原減罪犯者並仰
中書樞密院并所承受官司具前後詔條執奏不得施
行及臣庶家如有潛行貨賄結託貴近者並令御史諫
官覺察論奏咨爾丞弼體朕意焉

立皇子詔

王珪

人道親親王者之所先務也蓋二帝之隆治繇茲出朕甚慕之右衛大將軍岳州團練使曙皇兄濮安懿王子猶朕之子也少鞠於宮中而聰知仁賢見於夙成日者選於宗子近籍命以治宗正之事使使者數至其第迺崇執謙退久不受命朕默然有嘉焉朕蒙先帝遺德奉承聖業罔敢失墜夫立愛之道自親者始固可以厚天下之風而上以嚴夫宗廟也其以曙為皇子

為雨灾許言時政闕失詔

王珪

蓋聞古之聖賢在位陰陽和風雨時日月光星辰靜黎
民阜蕃以底休平朕甚慕之朕猥以眇身託於王公之
上夙夜以思惟懼不能以承先帝鴻業而比年以來水
潦為沴迺八月庚寅大雨京師室廬墊傷被溺者衆大
田之稼害於有秋竊迹災變之來曾不虛發豈朕之不
敏於德而不明於政歟將天下刑獄滯寃賦繇煩苦民
有愁歎亡聊之聲以奸其順氣歟不然則何天戒之甚
也今飭躬焦思欲銷復大異而未聞在位者之忠言進

祈自新厥路何繇焉應中外臣寮並許上實封言時政
闕失及當世之利病可以佐元元者悉心以陳毋有所
諱執政大臣皆朕之股肱其協德交修以輔朕之不逮

封太祖皇帝後詔

王珪

昔我藝祖皇帝之興以天發之期兵未始一血刃而卒
再造區夏其大謀盛烈被諸萬世而莫高焉朕奉承聖
緒夙夜不敢康乃顧後之子孫寢微弗顯而有司未嘗
議封爵之文豈朕所以尊大統推親親之意哉且積厚

者其流遠施大者其報豐宜令中書門下考太宗之籍
以屬近而行尊者一人裂土地而王之使常從獻於郊
廟世世勿復絕

皇太后付中書門下還政書

王珪

日者昊天不弔先帝上賓遽揚末命之言方結未亡之
痛而皇帝踐祚之始銜哀過情忽傳詔於外庭請預聞
於庶政載念承邦之重累申還辟之文皇衷未回羣聽
猶鬱顧人子之誠雖至然國家之事靡安况日聽治朝

躬發神明之斷出馳禁趨衆聞輿馬之音百姓莫不交
欣三靈以之薦祉吾嘗視前史之戒思系聖之圖將退
飭於母儀庸進彊於君德從容房闈不亦美歟昨權同
聽政事候皇帝康復日如舊去歲兩曾降手書還政輔
臣等並於皇帝御前納下今來聖躬已安好其軍國事
更不同處分故茲示諭宜體至懷

太皇太后賜門下詔

蘇軾

皇帝嗣位於茲四年華夷來同天地並應而皇太妃以

恭儉之德鞠育之恩雖典冊以時奉行而情文疑有未稱皇帝以祖考之奉尊無二上而吾惟春秋之義母以子貴其推天下之養以慰人子之心宜下禮部太常寺討尋如於典故有褒崇未盡事件令子細開具聞奏

太皇太后賜門下詔

蘇軾

官冗之患所從來尚矣流弊之極實萃於今以闕計員至相倍蓰上有久閒失職之吏則下有受害無告之民故命大臣考求其本苟非裁損入流之數無以澄清取

士之源吾今自以眇身率先天下永惟臨御之始常敕
有司蔭補私親舊無定限自惟薄德敢配前人己詔家
庭之恩止從母后之比今當又損以示必行夫以先帝
顧託之深天下責望之重苟有利於社稷吾無愛於髮
膚矧此恩私實同毫末忠義之士當識此誠各忘內顧
之心共成節約之制今後每遇聖節大禮生辰合得親
屬恩澤並四分減一皇太后皇太妃准此

合祭天地詔

范祖禹

朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方丘特祭之儀蓋將補一代之闕容振百王之墜典朕惟菲德嗣守丕基列聖已行謹當遵奉先朝未舉懼不克堪是以昔歲仲冬竭誠大祀神祇饗答祖考燕寧前詔有司載加集議猶欲咨度諸儒之論稽參六藝之文然理既不疑則事無

可議斷自朕志協於僉言祇率舊章永為成式今後南郊合祭天地依元祐七年例施行仍罷禮部集官詳議

元符日食求言詔

曾肇

朕以眇身始承天序任大責重罔知攸濟永惟四海之遠萬幾之煩豈予一人所能徧察必賴百辟卿士下及庶民敷奏以言輔予不逮矧太史前告天將動威日有食之期在正月變異甚鉅殆不虛生夙夜以思未燭厥理將以彌綸初政消弭天菑非藥石之規孰開朕聽况

本周行之內人有所懷芻蕘之中言亦可採凡朕躬之
闕失若左右之忠邪政令之否臧風俗之媿惡朝廷之
德澤有不下究閭閻之疾苦有不上聞咸聽直言毋有
忌諱朕方開讜正之路消壅蔽之風其於鯁論嘉謀唯
恐不聞聞而行之唯恐不及其言可用朕則有賞言而
失中朕不加罪朕言惟信非事空文尚悉乃心毋悼後
害應中外臣寮以至民庶各許實封言事在京於合屬
處投進在外許於所在州軍附遞以聞布告遐邇咸知

朕意

賜夏國主詔

韓琦

昨以夏國累年以來數興兵甲侵犯疆陲驚擾人民誘迫熟戶去歲乃復直叩大順圍迫城寨焚燒村落抗敵官軍邊奏屢聞人情共憤羣臣皆謂夏國已違誓詔請行拒絕先皇帝務存含恕且詰端由庶觀逆順之情以決衆多之論逮此遜章之稟命已悲仙馭之上賓朕纂極云初包荒在念仰循先志俯諒乃誠既自省於前辜

復顧堅於永好苟奏封所叙忠信無渝則恩禮所加歲時如舊安民保福不亦休哉

賜觀文殿學士禮部尚書王舉正不允詔

歐陽修

夫朝廷之廣大賢雋之衆多必有皤然耆壽之臣以當上所優禮之異或事思所訪則有老成俾時之式瞻以為人望故禮雖七十猶有不得謝者焉卿懿文高行有君子之風清節令聞為當世所重閱書祕殿日侍清閒

進讀經筵坐論道德固非有官司之責筋力之勞宜思
少安副我眷待

賜夏國主詔

歐陽修

朕嗣守丕圖日新庶政方推大信以協萬邦思與藩屏
之臣永遵帶礪之約矧勤王而述職固奕世以推誠而
近年以來將命之使或不體朝廷之意罔循規矩之常
多於臨時率爾改作既官司之有守致事體以難從且
下修奉上之儀本期効順而君有錫臣之寵所以隆恩

豈宜一介於其間輒以多端而生事在國家之撫御固
廓爾以無疑想忠孝之傾輸亦豈欲其如此故特申於
旨諭諒深認於眷懷今後所遣使人定宜精擇不令妄
舉以紊彛章所有押賜押伴使臣等亦已嚴行戒勵苟
有違越必寘典刑載惟信誓之文炳若丹青之著事皆
可守言貴弗違毋開間隙之萌庶敦悠久之好

賜南平王李德政歷日詔

宋 祁

頒歷之義以初為常俾一天下之歸用謹人時之授以

卿列壤南裔率職本朝宣我恩化慰彼黎庶每屬歲元
之會必榮廟朔之藏朕亦推處襪祥裁輔舒慘申命太
史分次左方宜案象以奉行表布和之胥洎特茲馳錫
勿怠欽承

賜判永興軍韓琦再乞相州不允詔

王安石

卿當國家之多難任社稷之至憂實能忠勤以濟勲績
方均逸豫適此外虞煩我元功良非得已亦惟體國義

不辭勞今雖尚謀經武之時非有蒐兵伐罪之事坐臨
諸帥固可優游何必舊邦乃能休養勉綏居息以副倚

毗

賜守司徒檢校太師兼侍中韓琦詔

王安石

便道之鎮朝廷故常來朝京師朕意所欲使事曲折既
當聞知忠言嘉謨又所饑渴雖知勤勩可不勉哉

賜富弼乞判汝州允詔

王安石

比飭使人具宣至意就令賜告冀遂寧瘳卿嚴祇朕命
不敢違息顧念吏卒閔其久留觸熱載馳用忘勤勩恭
以事上卿實有之仁及賤微又能如此忠誠所惻豈獨
朕心從容小邦姑以養福勉綏吉祿毋恤後艱

賜知亳州歐陽修乞致仕不允詔二道

王安石

股肱名臣與國同體禮當得謝朕尚難之况年非告老
之時而勲在受遺之籍不留屏輔人謂斯何姑體至懷

少安厥位

卿勲德之舊簡在帝心從容一州足以休養而抗奏至
於四五必以田里為歸豈朕視遇故老有不足於卿乎
何其求去之果也欲喻至意莫知所言惟能勉留實副
勤佇

賜答曾公亮詔

王安石

昔裁變異以戒人君推之股肱朕所不敢元勲舊德實
賴交修謹告之來必緣象類明諭朕志使當天心庶幾

君臣並受遐福不務出此而果於辭權是惟保身豈曰
謀國

賜特放知潭州燕度待罪詔

王安石

卿受命方隅助宣德化姦宄弗率乃觸大誅引慝自歸
謂當譴黜萬方有罪責在朕躬雖爾長民豈專任此

賜宰臣韓琦不赴文德殿立班待罪不允詔

王珪

天子之御正朝久而未講宰相之班百辟後亦從墮檻

臺簡之忽陳規邦彛之浸畧蓋延英賜對每踰中吳之
浴故宣政留班不及大昕之謁矧在職之匪懈奚引愆
而靡寧宜斥細嫌用綏素曠

賜河陽三城節度使兼侍中曾公亮乞免冊禮允

詔

王珪

天子臨軒拜三公其禮舊矣今朕以上公之秩加於元
臣方戒有司卜日而冊授之乃援比固辭不能為朕引
紱廷下吁其禮何時而可復耶雖用勉從則匪朕心之

懌

賜判亳州富弼乞罷使相不允詔 王珪

朕初臨丕基首撰大吏方勞精而共務忽引疾以屢辭
去雖踰於歲年念不舍於朝夕適覽奏函之旣又將使
袞之還且重祿所以賦上賢樂郡所以優舊德宜收曲
慮終保高名

賜吳奎免恩命不允詔

王珪

天子惟君萬邦建時百辟以祇迪於乃事矧曰左右之

臣以朝夕承乂乃辟予敢有弗欽爾克懋乃猷茲庸命爾圖厥政爾乃陳所以固辭朕命者三朕思有虞之世羣臣皆讓亦莫安厥位終敕之曰兪汝往哉爾弗遯聞於前人其率時訓惟厥中嗚呼慎爾止毋倚乃身乃罔弗孚於休

戒諭夏國主詔

王珪

維乃祖考克有西土世為漢藩輔今爾弗蹈於前烈迺竊署重爵以奉幣於朝方邊吏拒還乃復稽留境上不

及廷見之期洎朕親撫貢函而僭我王命實如所聞朕疑風俗荒遠未達朝廷之儀雖然棄信慢常誼不可長其務思先世之約以保綏於斯民毋忽是圖以奸我有邦之罰今後所差使人即不得僭擬

賜宰臣韓琦請郡不允詔

呂公著

夫忘身徇國者前志之所高送往事居者人臣之所勉顧惟寡昧矧在亮陰永言負荷之艱實賴股肱之助荐披來奏頗異予聞謂已事於山園必聽辭於機柄雖末

代或爾在本朝則無唯天聖之初馮拯去位非緣使領
而獲罷蓋以疾疚之匪任御體力素強望實兼劭所宜
遺履謙之近節懋經國之遠圖深體至懷勉綏厥位

賜王廣淵張詵獎諭詔

元絳

洮岷之役師旅載興維予信臣一迺忠力百爾調發並
濟厥須告凱奏功實繫攸助特加褒寵有腆分頒宜體
眷懷益圖來効

賜新除落致仕依前光祿大夫范鎮赴闕詔

蘇軾

夫有德君子以精神折衝譬之麟鳳能服猛鷲朕虛懷
前席以致諸老非敢必以事諉也苟得黃髮之叟皤然
在位則朝廷尊嚴姦宄消伏卿雖篤老乃心王室毋憚
數舍之勞以副中外之望

賜尚書刑部侍郎范百祿乞外任不允詔

蘇軾

成王命君陳商民在辟予曰辟爾惟勿辟予曰宥爾惟

勿宥惟厥中古之有司與天子相可否蓋如此而况公
卿之間議有異同而不盡其說哉例在中書與在有司
固宜審處歸於至當而卿遂欲以此去位非古之道也
其益修厥官以稱朕意

沿路賜奉安神宗皇帝御容禮儀使呂大防銀合

茶藥詔

蘇軾

於赫神考如日在天雖光明無所不臨而躔次必有所
舍肆予命爾祇奉此行禮既告成勤亦良至感慕之外

嘉歎不忘

賜阿里骨詔

蘇軾

惟爾祖先世篤忠孝本與夏賊日尋干戈亦惟恃我朝
廷爵秩之隆用能保爾子孫黎民之衆肆朕命爾嗣長
乃師而承襲以來強酋外擅爾弗能禁恣其所為遂據
洮城以犯王畧陰連夏賊約日盜邊朕愍屬羌之無辜
出偏師而問罪元惡俘獲餘黨散亡山後底平河南綏
服朕惟率酋豪而捍疆場乃爾世功叛君父而從仇讐

豈其本意庶能改過未忍加兵果因物以貢誠願洗心而効順爾既知悔朕復何求已指揮河路更不出兵及除已招納到部族外住罷招納依舊許班次往來買賣及上京進奉爾宜約束種類共保邊陲期寵祿於有終知大恩之難再勿使來疑復為虛言

賜正議大夫知鄧州蔡確乞量移弟碩允詔

蘇軾

以義責備春秋有失教之譏以情內恕詩人有將母之

念碩之得罪事在有司難以遺近之親而廢朝廷之典
反觀來請有槩予心重違兄弟急難之詞以傷人子奉
養之意

賜端明殿學士銀青光祿大夫致仕范鎮獎諭詔

蘇軾

朕惟春秋之後禮樂先亡秦漢以來韶武僅在散樂工
於河海之上往而不還聘先生於齊魯之間有莫能致
魏晉以下曹鄴無譏豈徒鄭衛之音已雜華戎之器間

有作者猶存典刑然銖黍之一差或宮商之易位惟我
四朝之老獨知五降之非審聲知音以律生尺覽詩書
之來上閱箕虞之在廷君臣同觀父老太息方詔學士
大夫論其法工師有司考其聲上追先帝移風易俗之
心下慰老臣愛君憂國之志究觀所作嘉歎不忘

賜觀文殿大學士集禧觀使蘇頌乞致仕不允詔

范祖禹

祖宗以來貴德尚齒鼎槐之老莫不眷留班於大廷表

儀百辟卿向繇省轄進涖宰司深執勞謙懇求去位置
使祠館勉徇雅懷已退處於丘園尚何殊於田里矧卿
筋力克壯聰明不衰中外所瞻足以重國體茲至意無
或費辭

賜新除觀文殿大學士中太一宮使范純仁令赴

闕供職詔

曾肇

卿三朝元老四海具瞻出處為邦國之重輕用舍繫仁
賢之消長久置散地宜還本朝俾陟降於殿帷仍總司

於琳館豈惟尊德尚齒昭示寵優庶幾鯁論嘉謨日聞
忠告昔周公已老猶在京師留侯雖病不去漢室眷惟
舊弼異世同心聞命疾馳副朕所望

宋文鑑卷三十一

欽定四庫全書

宋文鑑卷三十二

宋 呂祖謙 編

勅

頒貢舉條制勅

歐陽修

夫儒者通天地人之理而兼明古今治亂之源可謂博矣然學者不得騁其說而有司務先聲病章句以牽拘之則吾豪雋竒偉之士何以奮焉有純明朴茂之美而

無敦學養成之法飭身勵節者使與不肖之人雜而並進則夫懿德敏行之賢何以見焉此士人之甚弊而學者自以為患議者屢以為言朕慎於改更比令詳酌仍詔宰府加之參定皆以為本學校以教之然後可求其行實先策論則辨理者得盡其說簡程式則闕博者可見其材至於經術之家稍增新制兼行舊式以勉中人其煩法細文一皆罷去明其賞罰俾各勸焉如此則待士之意周取人之道廣夫遇人以薄者不可責其厚今

朕建學興善以尊子大夫之行而更制革弊以盡學者
之材予於教育之方勤亦至矣有司其務嚴訓道精察
舉以稱朕意學者其思進德修業以無失其時凡所科
條可為永制

賜右屯衛大將軍叔韶獎諭勅

歐陽修

朕固嘉汝嚮學勵善蔚然而有文與夫習富貴之驕而
樂狗馬之翫者異矣然夫學者所以知君臣父子之禮
出可以施於國入可以施於家汝其慎擇厥師講救其

闕使言而無過以自遠於悔尤夫能異於眾人誠為有立必至乎君子然後大成汝其勉之無或中止

賜陝西西路沿邊經略招討都部署司勅

宋 祁

朕卹軍旅之苦寵邊陲之良事從優寬情無遊愛至於常愆細過並許功除煩文苛法罕由吏議昨滕宗諒張亢並緣事任合給公用庫錢俾其宴享賓僚犒飭軍伍而乃用度無藝簿領失防陽託貿營潛有牟入攸司言

上遣使即推如聞逮繫頗多鞠劾彌廣本其冗費寧足
深誅已罷案窮悉令原貸其滕宗諒等止免一官量降
差遣雖屈吾法期慰士心且夫盡用市租美推趙將來
從我取誼表漢臣每慕前風大體尚慮諸道帥守便以
茲事為懲或損挾餽牽或裁量藥餌苟存畏避謂免譏
彈胡益至公亦非朕意但當循經費之式去自潤之私
取仰於官均惠於衆由茲底績夫何間然安節坦懷毋
或疑憚

罷諸路同提點刑獄使臣置轉運判官勅

劉 敞

國家兼覆寓內疆理天下分州立邑十有八路惟吏之不平民之失職政之頗類獄之糾紛未能獨察也故設糾虔之司使奉欽恤之寄專屬朝案貳以武吏誠欲審疑察枉釋冤決滯納民於不寃流化於無訟而武吏或起世家或由軍功文墨期會未必深究監司背項適增其繁夫非其習而望其效違其方而冀其功不亦難乎

其罷諸路同提點刑獄使臣令樞密院勘會已及二年者即令赴闕未及二年者與就移合入差遣及於河北河東陝西緣邊兵馬多處相度添置路分都監以次補用庶幾人盡所長官不虛受夫轉運使之任所以寄耳目治財賦集事功也江南東西荆湖南北廣南東西福建益梓利夔等十一路此其去京師遠者萬里近者數千里或跨帶山海崎嶇蠻夷而皆一員主之處則無與參慮出則無與僇力設有緩急之警調輸之煩機會一失

民受其弊甚非豫慮先事之策其各增置轉運判官一員以三年為一任選差第二任以上知州資序人候一任滿日與提點刑獄差遣初入知州及第二任通判資序人候滿兩任日與提點刑獄差遣若居部無狀隳職敗事亦重行其罰蓋士常患任之不當其材無以見長用之不久其任無以就功今朕別異文武使得自試選擢賢能使得次進吾於士大夫可謂無負矣其各竭力悉心勉成功名布告中外咸諭朕意

復天下州縣官職田勅

張方平

昔在先帝詔復公田合王制班祿之差得聖人養賢之義載原深旨本自愛民比者搢紳之間屢陳利害之意以謂郡縣受地有無不齊銓審除員權利為倖奔競以之傷俗因緣至于害人故嘗命官斷以定數誠足釐於浮弊然未安於予懷禮不云乎厚祿以勸羣臣則下之報禮重凡厥文武仕于朝廷雖廉素者惟士之常而富貴者人之所欲其全寬大之體自有公平之制所宜給

其所未給均其所未均約為等差槩令增足使事父母者得以致其養畜妻子者得以致其樂冠昏喪祭有所奉慶恤饋問有所施不牽私室之憂必專公家之慮則六計可以弊羣吏之治四方可以期衆職之修儻自犯于有司亦何逭於彛憲上廣先朝之惠示不敢渝下俾諸臣之言審茲自定惟爾中外體予所存

條制資廕勅

張方平

周禮大司樂掌學政以六藝教郡國子漢制光祿勳典

仕籍以四行察三署郎茲其官材本於世胄然當辨論
必屬俊良令廕法之所原古典刑之是憲惟因循之日
久寢滋蔓而倖多弊生作法之涼濫起推恩之過且賞
延于世諒非及於疎宗官惟其人顧何取乎髻稚暨階
仕進之路復無誨育之科室不茨墉田不疆畝處不裕
立身之道出不閑從政之方略觀貴途良鮮舊族此則
上因朝廷法制之不立下自父兄訓義之不孚故俾宰
司詳為定令使夫冢嗣先錄以篤為後之體支子限年

以明入官之重設考藝之格激之向學立保行之條勉
令率履前史不云爵祿者天下之砥石人君所以礪世
磨鈍茲實用焉庶乎位有稱職之才朝多濟世之美非
惟為國造士是乃為臣立家咨爾具僚知朕此指

皇族出官勅

蘇頌

自我祖宗慎叙邦族大則疏封於爵土次則通籍於
闈臺普集京師參奉朝請然而世緒寢遠皇枝益蕃屬
有親疎則恩有隆殺才有賢否則祿有重輕今而一貫

於周行是亦奚分於流別雖睦婣之道誠廣而德施之
義未周昨近臣數言宰司繼請謂宜定正限以等彝朕
惟親戚之間經史有訓漢唐之世典故具存或以九族
辨尊卑或以五宗紀遠近或聽推恩而分子弟或許自
試而効才能或宗子之賢得從科舉或諸王之女自主
昏姻盡前世之所行顧當今之未備况我朝制作動法
先王豈宗室等衰反無定著因俾羣公之合議將為一
代之通規載攬奏封具陳條目以謂祖宗昭穆宜從世

世之封王公子孫抑有親親之義若乃服屬之既竭洎
于才藝之並優在隨器以甄揚使當官而勉懋至於任
子之令通昏之儀几曰有司之常一用外官之法僉言
既允朕意何疑告於將來遂頒明命噫自義率祖既殊
升降之文因時制宜斯盡變通之利咨爾宗盟之衆固
多博識之倫奉承新書當體朕意

赦文

建隆登極赦文

闕名

五運推移上帝於焉瞻命三靈改卜王者所以膺圖朕
起自側微備嘗艱苦當周邦草昧從二帝以徂征洎虞
舜陟方翊嗣君而纂位但罄一心而事上敢期百姓之
與能屬以北兵侵疆邊民罹苦朕長驅禁旅往殄渠魁
鼓旗纔出於國門將校共推於天命迫迴京闕欣戴眇
躬幼主以厯數有歸尋行禪讓兆民不可以無主萬幾
不可以曠時勉徇羣心已登大寶昔湯武革命發大號
以順人唐漢開基因始封而建國宜國號大宋改周顯

德七年為建隆元年乘時撫運既叶於謳謠及物推恩
宜周於華夏可大赦天下於戲革故鼎新景命初隆於
王室青災肆赦鴻恩普洽於民心更賴將相王公協謀
同力共裨寡昧以致升平凡爾萬方咸知朕意

嘉祐明堂赦文

王 珪

朕承三聖之基履四海之貴深惟持國之日久益念為
君之道藉有臨聽之瘼庶以圖天下之佚無奉養之靡
庶以資天下之豐兢兢萬務之維微勉勉前事之所戒

倚以左右輔弼之正予敢有弗欽事于上下神祇之明
予敢有弗肅屬九穀登富三辰昭華象來梓海之祥塵
絕玉關之警有邦之應於朕豈功恭念為天之子者必
修報本之禮為人之子者必懷追養之慕重循非德屢
緝曠文頃按明堂之圖古如路寢之制載經斯室載度
斯筵直大火之駢芒乘季秋之肅氣物無上帝之稱非
躬祠不足昭虔虔聖維文考之尊非嚴配不足盡虔孝
於時備法物之駕服大冕之章格靈眈於真庭款清德

於太宇還祇宗祀之舉具飭純誠之將迺神光陸離燭
于薦鬯之夕喜氣休晏被于燎柴之時亶丕事之繼成
敢蕃釐之專饗宜乎廷渙以契天心可大赦天下於戲
承神之胙既均輝耀之微盪俗之瑕復若風霆之布蓋
禮鉅則擇之博孝至則勸以遐尚賴秉文之英經武之
傑厲同寅於王室壯大治於邦圖共荷無疆之休亦膺
無窮之聞

治平立皇太子赦文

王珪

王者承天立極莫不思長世之圖為國建儲所以正萬
邦之本故朕親先父子而天下皆以為愛命發朝廷而
天下不以為私粵子上嗣之良稟自日躋之聖出而就
傳寢窮學肆之聞入則承顏勤至寢門之間比疏榮於
王社益侈德於天枝顧荷丕基之艱猶虛正體之貳矧
漢文命嫡著於即阼之初年且夏后立子期以傳家於
萬世維羣元之所徯維大器之所承式符少海之祥宜
踐東朝之位肆顯冊之丕發嘉僉言之大同爰契歡心

用單曠澤可大赦天下於戲文昭武穆夙詒燕後之謀
震長離明本有承華之象蓋義重虜先者禮必亟舉慶
施虜上則惠必遐流咨爾庶方當體朕意

熙寧七年南郊大赦

元絳

王者欽崇神天嚴奉宗祏就郊以饗所以詔天下之恭
假廟而烝所以教天下之孝洪惟五聖之烈誕輯百王
之文肆予冲人昭事上帝載念物無以稱維一誠可以
展大報之儀祭不欲煩維三歲可以述躬行之典協會

康年之順道迎至日之長是用朝薦殊廷裸將太室乃
進登於陽時以裒對於皇穹合祛柔祗陟配文祖祝燧
告潔贊犧尚純六樂變音舞奏而諸物至二精揚燎煙
升而萬靈交方丕事之獲成敢蕃禧之專饗宜勇大號
以賚多邦可大赦天下於戲意盡精裡既秩宗祈之舉
政施惠衍亶昭慶宥之行維時黎元綏我德澤尚賴謨
明四近忠蓋羣材儀圖新美之功勩相隆平之運同底
于治永孚厥休

元豐立皇太子赦文

鄧潤甫

父子一體也惟立長可以圖萬世之安國家大器也惟建儲可以係四海之望位序蚤定而人莫不以為悅典禮亟崇而衆固敢以為私永惟上嗣之賢寔有妙齡之譽入而視膳孝友見於夙成出則好書聰哲繇於自得粵紹休於正統猶虛位於東朝廼考著龜之占廼稽方冊之實載涓吉日肇闢青宮周家先親不敢忘廟社之重夏后與子蓋以順天之心宜覃曠恩徧暨群品可

大赦天下於戲離明震長繇帝緒於億年解吉渙亨灑
天仁於萬物蓋禮之所行者大則澤之所流者深咨爾
多方體朕至意

冊

乾德上尊號冊文

范質

維乾德元年歲次癸亥十一月己酉朔十六日甲子攝
太尉守司徒兼侍中蕭國公臣質守司空平章事臣溥
尚書右僕射平章事臣仁浦及内外文武臣寮馬步諸

軍將校藩郡守臣四夷君長緇黃耆艾等七千五百人
謹再拜稽首上言曰惟天為大惟堯則之又曰舜有天
下無為而理是以古之言道德者莫先於二帝一則曰
聰明文思一則曰溫恭濟哲英聲茂實意無欲而自彰
景福洪休心無求而自至巍巍蕩蕩無得而言伏惟皇
帝陛下高明博厚宣慈惠和純粹之德全孝友之行著
惟精惟一知微知章向者龍尚處於潛淵日未離於暘
谷歷試之際志在扶危險阻艱難何往不濟躍馬蹈高

平之陣麾戈佐淮甸之征喋血鏖兵一月三捷勞旋飲
至論功莫二洎乎天監厥德用集大命人祇叶應風雨
咸若鼎運初建國步猶梗始則李筠犯順長戟指闕并
人連禍寇我北鄙於是以太行之行重進怙亂棄德崇
姦幅員千里生民被毒於是有廣陵之役千乘萬騎如
霆如雷詢彼仇方震疊區宇翠華宵至堅城旦下連平
二孽有同符契累朝已來出師誅暴未有若茲之竒速
也頃者華風不競中國政微五嶺三江置諸度外殊文

異軌六紀于茲肇啟聖謀驅攘寇亂荆湖底定南土晏
然燕薊之戎汾晉之孽燕巢幕上朝不謀夕邊事少間
理道無壅嚴恭寅畏一日萬幾勤於已而泰於人儉於
躬而豐於物明四目而高視達四聰而遠聽不侮鰥寡
恤天窮也信及豚魚遂物性也惜力念耕耘之苦推食
閔介冑之勞法家之流既峻且密乃詔大理重正刑名
俾盡哀矜務從寬簡減盜竊之罪緩鹽麴之禁好生之
德通於神明若乃昧爽丕顯坐而待旦商湯之戒慎也

側身損已長轡遠馭漢文之化導也循名責實信賞必
罰建武之法制也果敢決斷從善如流貞觀之風烈也
帝王之道於茲備矣太平之業於茲成矣於是祇見清
廟致其孝享圉丘展禮對越上玄一獻而天帝降祉再
獻而神人以和三獻而萬祿攸報祥風拂袂休氣繞壇
熙熙怡怡羣心胥悅國家大慶衆庶共之肆赦覃恩俾
民更始與天合道謂之應天天無不覆謂之廣遠無不
至謂之運博施濟衆謂之仁智周萬物謂之聖化成天

下謂之文保大定功謂之武其德無際謂之至德臣等
不勝大願謹奉玉冊玉寶上尊號曰應天廣運仁聖文
武至德皇帝伏惟垂日月之明監億兆之情凝旒端委
昭受鴻名如山嶽之固如松柏之貞乾健不息品物咸
亨承天之祐萬壽千齡

封祀玉牒文

闕名

維大中祥符元年歲次戊申十月戊子朔二十四日辛
亥有宋嗣天子臣敢昭告于昊天上帝啟運大同惟宋

受命太祖開階功成治定太宗膺圖重熙累盛粵以冲
人不丕承列聖寅恭奉天憂勞聽政一紀于茲四隩來暨
玄貺殊尤禎符章示儲慶發祥清淨可致時和年豐群
生咸遂爰荷顧懷敢忘繼志僉議大封聿伸昭事躬陟
喬嶽對越上玄率禮祇肅備物吉蠲以仁守泣以孝奉
先祈福逮下侑神昭德惠綏黎元懋建皇極天祿無疆
靈休允迪萬乘其昌永保純錫

尊皇太后冊文

歐陽修

維治平二年歲次乙巳十一月丁巳朔十有六日壬申
嗣皇帝臣某謹稽首再拜而言曰臣聞昔者明王之以
孝治天下者非家至而日見也蓋有要道焉推所以行
於已者為天下率盡所以奉其親者為天下先而四海
靡然而承風矣洪惟有宋受命造邦百年四聖而小子
獲承之以繼我仁考之遺休餘烈方與羣公卿士夙夜
以思勉其不逮庶幾如我仁考付畀之意以申罔極欲
報之心此固慄慄祇懼不敢違寧者也顧惟眇末之質

提攜鞠育慈仁咻煦至于有成自我聖母嗣位之始哀
迷在疚而憂勤艱難一日萬務協和綏靖保祐扶持功
施邦家亦惟我聖母永惟至恩大德無物可稱是以稽
參典禮率籲羣心合志一辭懇懇惓惓不勝大願謹遣
攝太尉具官韓琦司徒具官胡宿奉玉冊金寶上尊號
曰皇太后恭惟皇太后聖善明哲柔閑靜專粵自正位
中宮內助先帝陰禮修而教行儉德著而下化遂及萬
國先於正家逮夫玉几受遺遭時多難勉徇勤請權同

聽決而明識遠慮動懷謙畏深鑒漢家母后之失訖不踐於外朝及歸政冲人合於易之進退不失其正之聖是惟全節鉅美固已超出前古而垂法後世宜乎盛烈播于聲詩尊名光於典冊惟末小子獲奉溫清嗚呼殫九州之富以為養未足盡於孝心享萬壽之福而無疆期永承於慈訓臣誠懼誠抃稽首再拜謹言

皇后冊文

王安石

維熙寧二年歲次己酉四月丁酉朔二十六日壬戌皇

帝若曰自昔有天下必擇建厥配以承宗廟以御家邦
肆朕受命奉循前烈考慎典冊以祈協于神民咨爾向
氏懿柔淑恭舊有顯聞肇功唯祖弼亮帝室流德之澤
覃延後嗣是產碩媛比賢姜任越朕初載來嬪蕃邸盥
饋在中率禮無違以至嗣服祗承內事齋明夙夜罔有
曠失宣崇位號表正宮庭今遣攝太尉推忠協謀同德
佐理功臣樞密使光祿大夫檢校太傅行尚書刑部侍
郎上柱國東平郡開國公食邑五千戶食實封一千戶

呂公弼攝司徒朝散大夫右諫議大夫參知政事護軍
太原郡開國公侯食邑一千一百戶賜紫金魚袋王珪
持節冊命爾為皇后夫惟興王釐厥士女咸自內始達
于四海朕克勤人用弗怠朕克儉人用弗奢朕克正人
用無反側爾勤相朕乃濟登茲於戲匪初惟艱惟
慎厥終爾忱念茲朕以永享天祿爾亦豫有無疆之福
豈不韙哉

仁宗皇帝加上徽號冊文

王珪

維元豐六年歲次癸亥十一月壬寅朔二日癸卯孝孫
嗣皇帝臣謹再拜稽首言曰臣伏觀古先格王莫不大
名發於前而大惠昭於後其法皆本於至公而不可易
至後世臣子又欲盡報上之道以謂君德甚盛其言不
足以包衆美於是有至郊加誅之文夫欲推事存之禮
述追遠之志則奉素享之榮號益新紀之鴻烈謀羣公
請太室洋洋庠際天接地而震顯之不亦當靈心而傳
古誼乎恭惟仁宗神文聖武明孝皇帝躬清明之資賦

神睿之略乾行施之不息仁性根於自然時乘六飛端御大器知窮八荒而不見其迹澤及萬彙而不居其功爾乃簡拔畷賢放遠邪佞宥恕刑獄懷保鰥寡賞不徇所私罰必當于理興農桑之本務緝禮樂之隆文有慘怛好生之心吏或誤入重辟必終身見斥有寬裕從諫之度言者屢進狂直必曲意見容念兵革之傷夷則不殺而服念稼穡之勤勞則固寧于勉矧履天下之尊而持之以抑畏饗天下之富而寶之以儉素輿馬不聞於

游盤鐘鼓不涉於閒燕宮室亡奢靡之飾器服亡瓌竒
之玩加以夙夜齊臬事天之誠盡霜露怵惕念親之感
深方朝廷之久安迺大革因循而聖政又新為社稷之
重計迺前定禍亂而皇嗣蚤立故四十二年仁恩川流
涵濡薰蒸格于上下日月華風雨均四時飭百穀蕃北
有契丹而不能驕西有黠羌而不能軼蟲魚遂性自安
川藪之游男女潔誠更趨耕織之樂固有幽遐荒昧之
俗不約而子來竒偉個儻之瑞不劫而特見者矣丕赫

哉憲度鴻明聲文沛施自載籍之傳蓋未有休功盛業
可加于茲也重循涼菲永念猷訓今將款清廟陟紫壇
遂受厚福以浸黎元宜於此時臨彤庭發玉版上不敢
隳祖宗之典下不敢虧神民之情如堯如舜如禹如湯
豈不高一世之聞而流萬世之聲哉爰飭上儀載揚景
鑠謹遣銀青光祿大夫守尚書左僕射兼門下侍郎上
柱國太原郡開國公食邑七千六百戶食實封二千五
百戶王珪奉玉冊玉寶加上徽號曰仁宗體天法道極

功全德神文聖武濬哲明孝皇帝恭惟明德在天臨受
徽稱維億萬年永錫嘉祉謹言

立夏國主冊文

王珪

維熙寧二年歲次己酉三月戊辰朔十四日辛巳皇帝
若曰於戲昔堯合萬邦而民風和周建列土而王業櫛
若古申命蓋國家之成法也咨爾秉常迪性純一飭躬
靖虔生稟山川之靈舊傳弓鉞之賜撫有西夏尊于本
朝知事君必盡其節知守國當保其衆乃內發誠素外

乎誓言質之天地而不欺要之日月而不昧朕用稽酌
故典表顯徽實錫爾以茅土之封不為不寵加爾以車
服之數不為不榮涓辰既良備物既渥誕舉丕冊以華
一方今遣朝奉郎守尚書司封郎中上輕車都尉賜紫
金魚袋劉航文思副使銀青光祿大夫檢校太子賓客
兼御史大夫騎都尉彭城縣開國伯食邑七百戶劉愆
持節冊命爾為夏國主為宋藩輔夫履謙順者靡不膺
長福懷驕肆者靡不蹈後虞率身和民時乃之績往欽

哉祇予一人之彛訓可不慎歟

皇后冊文

李清臣

皇帝若曰天相予祖宗茲歷世寧康朕既敬紹丕緒罔
作麗觀底信內外惟式斬以正邦今左右弼臣禮儀正
貳暨族老宗婦各虔厥事咸鋪繹舊聞明敷于位曰乾
施坤承日照月儷四時不忒萬物用成盍稽則象詢
考卜筮若時元吉正名錫服俾長首六宮以母天下予
惟國有故常是何敢弗率咨爾王氏乃祖忠勞王家書

于太史子孫公侯出入藩服惟功澤逮茲是碩媛淑嫵
溫恭備有嘉德聘歸王邸入承事皇姑靡不若禮上天
右序予家蚤育元子慶在宗廟惠賚于四方乃以其年
某月某日遣攝太尉具官某攝司徒具官某賜爾皇后
之寶方寸有半文盃螭紐授之玉冊厥簡五十命爾翟
衣笄纚博鬢黼領大帶以朝暨歲時將祀于東西宮金
輿朱蓋虎賁禁衛步障行導是惟顯哉爾其克后職思
后道履中體順茲日饗多福集大祐于厥躬其尚攸助

予治昭聞于無窮於戲懋戒之哉

仁宗皇帝哀冊文

韓琦

維嘉祐八年歲次癸卯三月癸卯朔二十九日辛未仁宗神文聖武明孝皇帝崩于福寧殿旋殯于殿之西階粵十月戊辰朔六日癸酉遷坐于永昭陵禮也龍馭賓天珠襦留殯萬方之軌同臻七月之期茲近法仗已嚴靈輜未進風雲慘鬱以生悲臣妾涕號而思殉孝子嗣皇帝臣某接統承堯念親晞舜徘徊象物驚禁從以

如存權慕僊游致哀誠兮必盡繫臨奠以長辭蓋終天之永恨乃命弼臣以文傳信其詞曰惟宋受命與天無疆藝祖以武底寧四方神宗以文萬邦一王真廟紹隆赫然其光逮夫仁宗益熾而昌厥生之初上帝惟祐天日之表振古未覩色出圭璋步嚴龍虎其俾真人來綏下土元良之建七宅是主寢門之問惕若文武嗣訓之循纂承丕緒左右獻言以蒙自處大運歸乾獨化陶甄進良黜姦始章聖權其仁如天其度如淵其仁伊何得

之自然草秀而茁蟲飛而翔尚不忍傷况吾民焉惠澤
之霈滂洋幅員物無不滋四十二年猗如天兮化功則
全其度伊何汪然莫際巨細必容默分誠偽臣在言職
不知諱忌時肆詆訐衆嫉狂易聖心怡然曰此忠義是
也吾從過焉何戾猗如淵兮是能致治明慎庶獄極于
哀矜惟法所在未嘗妄刑郡邑之吏責之詳平一失入
罪無階顯榮尊為天子以儉為貴崇尚清虛屏斥紛麗
向緣不憚輔臣入視殿幄蕭然茵衾故敝率用繒素了

無文綺衆目驚嗟上曰何謂吾之受用素止如是此民膏血烏敢妄費恭事天地孝承祖宗九見園丘再祇合宮大裕于廟親藉于東服器精備棗盛潔豐小次不御秉圭顛顛何必戶曉民胥偃風取士之路務存至公十二臨軒策之必躬雋髦盡得巖穴幾空有將有相曰功曰庸眇視三代吾其比崇北人之強西夏之獯時欲侵陵恣其貪嗜吾以威懷折其凶銳兩皆心降從我控制百蠻梯航琛賫日至禮樂具修干戈不試夫惟立嗣天

下之基前世令王或牽以私事不前定濱于亂危我出
獨斷挺然不疑求賢于宗唯聖是知神器之重其傳有
歸廟社以安生靈以嬉迹其大公堯舜之為昔在人上
必有偏好或樂馳逐或喜征討或務宴游或專營造或
邇聲色或泥丹竈碁奕之工擊拂之妙有一于此下從
而效噫吾仁宗澹無所樂曰吾好者在勤政道日必盱
矚惟先之紹閒時弄翰或隸或草聖帚之揮千竒萬巧
去冬之暮清燕之間再闢天閣詔呼從官親作飛白侍

臣縱觀心合造化生成筆端書幅踰百大均寵頒退坐
群玉行觴盡歡嗚呼哀哉賜墨尚濕宸章未刊植璧斯
虞遽有金縢之禱綴衣遂徹俄承玉几之言嗚呼哀哉
大變之來天傾地裂四海之慟風號雨血兆民震駭其
無生百辟冤呼而僅絕乘雲之游兮汗漫而自高持顛
之慕兮僵仆而徒切因疑前會之非常似與羣臣之叙
訣嗚呼哀哉候律云凜諏辰協元嚴屢路以方駕視羽
幢兮始前池竹搖雉車旗飾鸞背朱雀之通達柏青龍

之吉山關路長兮去復去宮車挽兮還不還痛徹六宮
兮莫如逝淚灑重瞳兮胡可攀嗚呼哀哉寒日晝昏愁
陰夜積卷晴霓於丹旒蕩霜波於素帟悲笳互咽六州
之奏增悽駿嶽前瞻萬歲之聲何聞大隧一扃幽堂永
寂人間之恨空長帝所之歡豈極嗚呼哀哉秦漢而下
御邦子民夏越三紀纔聞數君其間治亂以相駁否亨
之不醇如仁宗享國之久而始終太平兮彼安敢望吾
之清塵生而無窮者厚載健而不息者高旻惟至仁盛

德與高厚之俱兮萬世巍然而不泯嗚呼哀哉

宣仁聖烈皇后哀冊文

代宰相

畢仲游

維大宋元祐八年歲次壬申九月三日癸酉大行皇太后崩于壽康殿旋殯于崇政殿之西階粵明年正月遷祔座于永厚陵禮也叢殿齋空袒庭燎暎雲似卻而復凝月雖輝而如慘孝孫嗣皇帝臣某臨遣奠以興哀瞻振容而永慕鳳吟管以何悲龍挾輶而若駐羽衛羅闕神儀布露爰制近司紀陳聖度其詞曰皇矣大宋寶

命自天重明累聖跨成軼宣正后在中契于坤乾較任
比姒亦逾于前有糸自姜源深積厚功熙我朝方虎是
偶奄韓宅魯益昌厥後月瑞日符是興太母於鑠太母
躬義率仁居靜猶地含和如春正素自稟聰明夙聞作
合英祖齊昇並曜受養神考陰功善教體道不違惟德
是微元豐末命帝命惟辟聽斷勉同以補天隙擁祐神
孫立民之極恭以勵人儉惟化俗衣有大練奄無片玉
房闈不出四海在目信義由中九夷思服如鑑不塵如

璞不緇三事大夫正直是咨宗藩外戚滲漉惠慈人爵
王官雖卑不私廟謁靡行外朝靡踐池籞靡臨惟正是
勉服御靡更惟惡是善庸爾萬方為則為典左右皇躬
動有壇宇居由範防造次于是寢隆且昌如天清明霽
日之光治化方成憂勞亦至外若平居中潛構厲坤軸
輒以夜摧月輪翩而曉陞守大化之靡怛尚斯民之為
意嗚呼哀哉珠箔低垂兮雲霧猶隔蕙帳髣髴兮爐煙
未銷想仙馭以何適謝人寰而已遙萬乘號慟哀纏九

霄干官縞素雨泣東朝嗚呼哀哉人與神兮變何速秋
復春兮時以徂犧擗盈兮未忘於平昔池綉動兮難留
於須臾翼八翼以為衛陳六衣而汜塗嗚呼哀哉野蒼
茫兮人漸遠仗徘徊兮天欲晚遡洛澗兮嗟備物之如
在逾鞏岸兮知神遊之不返山川已兆於真宅松柏猶
凝於故苑嗚呼哀哉玉晦龍蟄金藏鑑昏泉闌掩夜宮
闌泣晨車軌同兮雖來於萬國寶座閉兮惟朝於百神
魚惟炬以非日鴈長飛而不春嗚呼哀哉成內則於三

宋三十二
朝貽素風於十祀致理之勤分今已往大道之公兮古
如此何遠其家以為國而憂其民之猶子宜大書而作
冊俾永光於宋史嗚呼哀哉

欽聖憲肅皇后哀冊文

李清臣

粵建中靖國元年辛巳歲正月壬戌朔十三日甲戌大
行皇太后崩于慈德殿二月壬辰朔十一日壬寅殯于
西階以三月壬戌朔八日巳巳戒百官請命於太廟謚
曰欽聖憲肅皇后太史筮之將以五月辛酉朔六日丙


寅遷座于永裕陵禮也哀子嗣皇帝臣某極永感之
懷寫無窮之慕躬薦河酌奉寧輜馭痛三牲之養忽至
於遣奠悲萬壽之祝俄成於晞露罄咳如在聲容不返
畢銅史之餘滴動金商之清挽暑令忽其成淒薰風颯
其變慘像設既嚴物儀具有惟是冊書用傳不朽宮臣
承詔式虔事守紀漸寓哀貽之永久其詞曰我宋隆康
恩漸動植遠惟暨邇生成滋息趨走賢智修官懋職遐
及四裔左衽重譯維相向公梁棟宗祏逮女曾孫迨家

瑞國蚤歸王藩旋被禴翟至性溫溫令儀翼翼道意禮
學生知自得慶壽寶慈問安昕夕執養寒暑端莊不易
內輔神宗贊助陪益凡厥見聞舒徐啟迪十有九年晏
粲椒掖萬邦託慈六宮仰式約省外氏湯沐脂澤斯世
丕平陰與多績比懿夏商塗山簡狄姜嫄太姒朕袞並
烏元符三祀歲執徐直正月己卯變同劓若巍巍哲宗
武威文德夫何弗祐忽遘窀窞上嗣考廟將決大策于
時弼臣或藏邪慝輒進異論欲倒白黑賴我聖母沉潛

剛克折之陛前氣殫語塞庭羅屏渠門屯關戟德見利
人寰宇慶懌一指顧間長寧社稷譬如媧皇神工妙力
鍊石補天斷鼇立極冲融宇宙滉漾滌滌靡賢不登靡
寃不釋臣嘗侍對與聞訓敕曰我皇帝聖材天錫子道
勤恣政事祇惕治本亂原講磨紬繹惠心溥博物理研
覈帝堪多難子復明辟何俟衎饗始還禁閭幸濟初艱
後固餘責重下教告亟就安適帝板以留懇款襍積數
請弗回推璽卻籍義盡今茲事高往昔在漢馬鄧固多

慚色其於邦民憂不離臆動履仁儉示先壺則服無珠
璣器無瑤碧懲戒彫繪棄捐組織言祖經墳智該儒墨
諸書過眼疑微洞析兢兢瞿瞿殆忘寢食涼暄密移疹
氣侵蝕皇帝聖孝啟處在側藥審刀圭術窮鍼石禮禳
山川猶期千億丹劑雖靈冥筭終厄佛供晝昏喪氛夜
赤祲象告凶軒星示坼數圮坤元景淪望魄五十八載
馳光度隙嗚呼哀哉梓匠奏工嬪娥罷飾帳帶光途壇
堂撤席縞士鼎鼎絳旌奕奕左背城闕右經阡陌毅騎

趁趨綈車咿噫簫笳悲吟鹵簿哆赫萬類奔輝四民聚
戚御服苴麻皇情樂棘嗚呼哀哉霧雨故宮莓苔舊城
鳳幌蕭森獸扉虛寂輦路鑑奩孰非陳迹引望山園涕
濡竹柏惟有徽音長留寶冊嗚呼哀哉



宋文鑑卷三十二

卷三十二

宋文鑑卷三十二

欽定四庫全書

集部

宋文鑑卷三十三

詳校官監察御史臣劉湄

助教臣常循覆勘

總校官降調編修臣倉聖脉

校對官中書臣高 中

謄錄監生臣朱上林

欽定四庫全書

宋文鑑卷三十三

宋 呂祖謙 編

御札

大慶殿恭謝御札

歐陽修

勅內外文武臣寮等執珪璧以事神嚴祖宗而配帝雖
有國之常典亦因時而制宜朕承三聖之丕基撫萬邦
之有衆儉于已使天下之民豐勞于心致天下之民佚

罔敢怠忽庶幾洽平而首春以來偶奕調適賴三靈敷祐百福來臻順以節宣獲茲康裕加以邊隅不聳風雨以時雖庶物之咸和顧眇躬而增惕是用稽先朝之成憲詢故實於有司即廣殿之翼嚴擇靈辰之良吉式伸昭謝以格純休宜示先期俾茲誕告朕取今年九月內於大慶殿行恭謝之禮其今年冬至親祀南郊即宜權罷所有合行諸般恩賞並特就恭謝禮畢一依南郊例施行至日朕親御宣德門宣制仍令所司詳定儀注以

聞務遵典禮勿俾煩勞咨爾多方咸體予意故茲札示
想宜知悉

熙寧元年南郊御札

王珪

有天下者莫重上神之報為人子者莫嚴宗廟之承率
躬三歲之祠常候一陽之應緬慕先聖光施冲人載循
禋類之期適在諒陰之際大懼不能備飭儀物奉將粢
盛於是刺六經之文傳博士之議皆以謂喪有以權而
順變祭無以卑而廢尊矧稽參西漢之彛訟用景德之

制顧予涼菲賴帝况臨遂卜天正之辰往修郊見之禮
方且進祈茂祉以大比黎元昭格至精以終圖熙事庶
幾能養其敢憚勤朕以今年十一月十八日有事于南
郊咨爾攸司各揚厥職諸道州府不得以進奉為名輒
行科率其百司除事神之物並宜一切仍舊外餘應于
供奉所須務令純約以稱朕不忘孝思之義

熙寧四年大饗明堂御札

元絳

勅内外文武臣寮等朕荷二儀之休履四海之富經庶

政之至治秩將禮之彌文欽惟五聖之謨常躬三載之
祀自纘隆於大業已肆類於圜丘興言總章未詔嘉饗
維仁祖之武宜謹於遵修維文考之尊宜嚴於陟配况
萬寶時楙三光仰澄官師協恭方夏底定是用稽仍路
寢之制涓選肅霜之辰上以哀對天明展昭事之重下
以勅厲民志示遣養之勤特戒先朝以孚大號朕取今
年季秋擇日有事于明堂其今年冬至更不行南郊之
禮所有合行諸般恩賞並特就祀明堂禮畢一依南郊

例施行至日朕親御宣德門宣制咨爾攸司各揚厥職
諸道州府不得以進奉為名輒行科率務循典故無致
煩勞

批答

賜除宰臣文彥博讓恩命批答

歐陽修

省表具知朕躬儉約以先人而生民未足勤憂勞以勵政
而百職多墮豈布德之不明抑任人之弗至是以齋居
正慮先志後占鑒屢易以為煩念難知之可慎永惟商

周之所記至以夢卜而求賢孰若用縉紳之公言從中外之人望卿以舊哲比嘗相予惟守量能寬以服人惟純誠故久而益信勲德無著可以重朝廷忠信不回可以臨大事夫謀於其始而既審則果於必用而不疑汝其欽哉朕命無易所讓宜不允仍斷來章

賜新除宰臣富弼讓恩命不允批答

歐陽修

卿有憂國愛君之心而忠以忘其已有經邦濟時之學

而用未究其能夫畜久而積厚則施之不窮慮深而計熟則謀無不獲茲朕所以虛心仄席有望於卿也矧卿正直不回庸邪素忌小人所異君子所同是以在外十年而左右之譽不及履躬一德而搢紳之望愈隆朕內決於心外詢于衆敢謂有得卿其何辭

賜宰臣富弼乞退不允批荅

歐陽修

朕眷惟宰輔之司實繫朝廷之重職或非稱勢因易搖比以連年厭於屢易或用人之不審致厥位之靡安故

於圖任之初尤極精求之意而議者謂卿有天下之譽
慶朕得非常之才豈惟斷不惑於予心固以慰久鬱之
人望則朕之用卿者至矣卿之自待者如何而方沃嘉
猷遽形退讓駭無因而及此曾莫諭於乃誠豈廊廟之
崇貴重者其憂難任而富貴之至位高則其慮易危邪
朕嘗厯考往昔之人其於進退之際過計而圖全者未
必無患忘身而徇國者固多令名惟爾之明必知所擇
宜少安於職業用深體於倚毗

再賜宰臣富弼乞退不允批答

歐陽修

夫知人之明可謂難矣而任賢之術茲豈易哉若乃聽之不聰信之不篤施設之方未盡弗極其材遲速之效有時莫能少待則被其任者實亦艱歟卿以純一忠亮之誠蘊宏深遠大之業朕虛已以聽推心仰成至於一二之臣是惟同德下逮衆多之論曾靡間然方將甄叙賢愚修明法度務究本根而吏治不逮歲月之近功期於有成茲乃予意奈何中道而將止夫亦奚託以為辭

矧上下既交寧有不通之志而君臣相遇豈為易得之
時當體余懷勉安厥位

賜宰臣富弼乞解機務不允批荅 歐陽修

夫宰相之事非可以歲月考而一二數也其在朝廷選
賢任能而各得其職下俾民俗遷善遠罪而不知其然
至於法度修紀綱正然後相與慎守而安行之以臻于
治此朕所以虛心一意日有望於卿者也今事有緒而
卿辭焉豈朕德之不明將顧時之不可中道而止夫何

謂哉俾予獲用材不盡之譏而卿涉苟安自便之計予所不取卿其勉焉

賜宰臣文彥博乞解重任不允批答

歐陽修

夫知其人之為賢任則勿貳事其君而有道去不可輕此古之臣主之明舉措必慎所以收功於一時而垂法於後世也卿夙有時望為予柄臣自復秉於國鈞僅三周於歲序若乃進退賢否誅賞罪功每於聽納之間敢

忘虛已顧彼搢紳之論曾靡異辭方期有成以副予意而乃過形謙損思避台衡豈寡德弗明於用才而不盡將多言害正致厥位之難安苟異於斯夫何引讓矧卿忠信之節足以叶予之一心材謀之優可以斷予之大事茲所東注寧煩諭言

賜樞密使宋庠讓恩命不允批答 歐陽修

朕以因時致享克展於孝思已祭受釐大均於慶澤乃眷眷明之哲實予體貌之臣肅臨事之有容既交神而

蒙貺宜推異數以示眷懷雖嘉好謙曷止成命

賜杜衍讓恩命不允批答

宋 祁

比虛右弼以須峻望卿清約忠壯華皓一節出入諷議
靡事不為挺然公實見於有政朕志先定成命惟行况
萬幾處可百職修理朕所倚辦卿宜知之遽閱讓函猥
徇謙槩且誕告群方不容顛辭久曠台路便廢撓遜欽
服寵章

賜賈昌朝讓恩命不允批

宋 祁

卿曩侍經筵已知國器歷守京邑則風績早樹進領邦
憲則威名流聞揚休山立自處中道朕以為履正識敏
材任輔佐引與機政參貳台司曾是踰年休有成效觀
德則懿俾課則臧斷自予志冠升樞省誕告百執初無
異言猥露奏封深荐撫遜况訓諭已熟典命難淹速即
欽膺以光朝舉

再賜杜衍讓恩命不允批答

宋 祁

向以戎醜尚桀師伍留屯公私之匱不可貲省又官濫

於外吏欺於中苛察過當乎競成俗濟水無益治絲愈
芬圖所振整未知厥序以卿久在樞禁習總事經年者
識茂盡悴事國是用選自予志對秉台衡藉敏材以康
調發之難褒介節以懲進取之弊朕既寡德方茲仰成
尺奏荐聞能讓猶固已嘗批喻宜體眷永毋煩費詞早
膺寵典

賜陳執中韓琦讓恩命不允批答 宋 祁

朕比執珪幣祇事神祇至誠所向鴻釐如答是以推行

天祚沛流茂恩徧錄侍祠之勞悉從進律之典卿卓有
成效協於僉言而臨榮引讓稽恩未拜閱露章而既熟
非公論之所期便可欽膺即廢謙執

賜皇弟允迪讓恩命不允批答

宋 祁

朕敦睦懿親差次寵典年長者崇爵屬近者尚恩眷爾
忠賢用加節制公言期協朝渙既頒何執常謙欲遂素
守道風雖亮允令難稽往哉惟諧毋或煩請

賜皇長子淮陽郡王免恩命不允批答

王珪

昔我祖宗誕受天命厥惟艱哉克正皇猷丕懋乃績以
遺我子孫無疆之休今朕纂厥服惟稽古建爾元子于
有邦乃季秋辛亥群公庶尹罔不祇朕言于廷爾乃陳
德弗及期畀于一二弟兄之賢我聞曰立愛惟親立敬
惟長其敢示天下以私庠汝惟往哉尚迪時命無違

賜皇伯祖承亮改封秦國公免恩命不允批答

王珪

夫戚藩之建王室是毗古者皆世襲其封近代或別予之邑既非祖烈之服又失廟祠之傳故朕推近屬之長賢修先王之舊履以大子孫不絕之序以均宗社無窮之休適覽露章過形冲節宜體親親之意庸光繼繼之圖

賜宰臣韓琦已下乞立壽聖節宜允批答

王珪

赤制告圖肇承題序青煒動陸俯協誕期卿等過稽舊

章列上芳牘緣華封之素祝建壽聖之嘉名竊惟受天
元符撫國休運百辟稱觴而在席四夷奉幣而在廷敢
以菲懷仰于輿望

賜宰臣韓琦已下尊號不允批答 王 珪

朕獲承大統三載于茲蒙天之休海內清靜方將飭齊
輅潔純犧以祇見天地宗廟之靈乃敢昭發丕冊揚徽
垂鴻以自施庠尊榮者哉不圖執事之臣列上表功之
號且臨政之日淺未有盛烈之章况事神之意忝豈在

彌文之飭適增于媿難徇所陳

賜宰臣韓琦免恩命不允批答

王珪

夫王者壹天下之俗宰相遂萬物之宜故君臣同德而教化成朝廷上賢則分職治肆朕承邦之久得卿共政之均且國用失浮規節財力之匪易吏塗過冗甄序名品之為難歷勤勞之百為蹈夷險之一致向屬冢卿之缺適登台席之元稽卜神謀孚言朝聽維百辟之是式維兆民之是瞻奚興曲讓之辭殊匪大公之舉慊然衆

志鬱于予聞蓋德盛而位隆者望雖與歸然任劇而責
至則事當隨決思體睠眄之異祈收撫固之情往代天
工毋留邦渙

賜宰臣曾公亮免恩命不允批答 王珪

夫天文中階之象色正則二氣鈞國柄三事之司體公
則萬化緝朕何嘗不寤寐邦傑彌綸政機以敦美風俗
之源以甄序官師之品所繫甚大維材之難卿行足以
厲朝謀足以經國代言二禁而號令鼓舞群動賦政中

畿而神明炤于宿姦頃陪議於宰臣旋冠謨於宥省邦
之維度靡不舉兵之紀律靡不張屬上台之進賢宜右
弼之膺寵忽起舜庭之讓未施鄴國之規群情鬱然予
心勞止矧夫付安危之幾則望豈云淺當名器之分則
處之勿疑所期廣猷慮以同寅會精神而輔力當抑謙
風之固往調大化之元豈朕之獨致太平亦卿之與有
令聞

賜韓琦免明堂恩命不允批答

王珪

予臨路寢之上曾覽八紘邈然有通神明之志迺季秋
宗祈既右上帝亦右文考始予齋精臨獻而懼不勝及
觀夫簠樽在堂鍾石在庭至陟降上下之數與夫九州
四海美物之薦罔不具飭噫何其禮之盛歟非爾元宰
之臣孰總裁劑之故已降之制為百辟先亦皇天降休
命于我家非予之所敢專也今書固辭顧不廢予惠術
之施序

賜郝質免恩命不允批答

王珪

國家提萬兵之勁萃之畿中謀元帥之良護于巖下矧
卿嘗從征伐之事加有宿衛之勤宜授鉞於師壇總環
宮之夜柝蓋旌勞者必異其寵御衆者必予之權毋為
過兢其服重委

賜宰臣富弼乞退不允批答

王珪

朕肇履邦圖每恭天戒屬初災之在序偶時澤之弗滋
且正于近畿顧民災之未遠然應不旋日知人事之已
修卿還來相予居位未久奚抗章而引咎將援故而辭

權雖蹈夫聖賢遠覽之思殆戾於君臣交儆之意勉規弗及終底于成

賜歐陽修乞退不允批答

王珪

夫與政之途蓋天下之責至者叢矣顧雖智勇不能以禦流訾之來前日御史加非於卿朕惟其辭甚悖於義理之文今讒者放而疑者釋卿猶欲以去位豈朕所望焉傳不云乎禮義不愆何恤人之言其起眎事毋重朕之不敏也

賜宰臣韓絳免恩命不允批答 元絳

卿方重淳深清明端亮閱文武之二枋曠謀猷於百為
屬者西羌侵邊王師淹戍往視方略以宣威靈嘉維爾
忠蔽自朕志絕軼前代比登冢司扶世澤民將倚調於
元化靖兵戡亂猶佇建於膚公况維渙號之孚已穆廣
朝之聽胡為懇拂欲避隆名雖難進之風自高冲尚而
仰成之屬殊煩顧懷趣宜欽承毋重撓固

賜宰臣韓絳已下上尊號不允批答

元絳

朕聞唐虞之世君臣吁俞相與敕戒以康庶事未聞其
自耀功德大為名稱以動天下之聽朕以涼菲獲承皇
緒固已極崇高之位號矣嚮者奉郊宗之祀三事大夫
亦屢以徽冊來上而愧不敢從方且嘉與眾賢夙寤晨
興以營極治之業要之萬世建無窮之基亦有無窮之
聞不猶愈於虛名歟臣之尊君義則勤至朕守弗奪毋
煩數陳

賜皇伯宗諤免恩命不允批答

元絳

卿爵齒兼尊德名參劭佑予郊廟之事克有夙夜之勤
疇勞策勲時乃舊典往承成命無用勤辭

賜陳升之免恩命不允批答

元絳

卿久服樞筦協成王功屢陳誠辭願解幾政方建將旄
之重寄且增台路之華流輔成萬微嘗宣左右之力兼
賦二枋宜旌文武之謨即當欽承安用冲挹

賜宰臣王安石已下乞御正殿復常膳不允批答

元絳

垂象之變咎在朕躬內惟菲涼敢不祇懼避朝捐膳欽
天之渝神休震動銷去大異而三事庶尹咸造在庭願
復舊常至于再請且星隆晷德猶賴交修况天畏棗忱
固當屢省弭灾嚮福其庶幾焉

賜劉摯辭免恩命不允批荅

蘇軾

政如農耕以既穫為能事言如藥石以愈疾為成功若
耕不穫疾不愈朕何望焉所以用卿者非以富貴卿也

勉卒成業何以辭為

賜太師文彥博乞致仕不允批答 蘇軾

卿出入四世師表萬民無羨於功名而有厭於富貴其所以忘身徇國捨逸就勞者豈有求而然哉凡以先帝之恩生民之欲也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自致魯穆公無人子思之側而長者去之卿自為謀則善矣獨不為朝廷惜乎藥餌有間時遊廟堂家

居之樂何以異此

再賜太師文彥博乞致仕不允批答

蘇軾

朕修身以承六聖虛已以聽四輔而法度未定陰陽未和民未樂生吏未稱職中夜以思方食而歎雖不敢以事諉元老實望其以身率百官卿猶未即於安孰敢不盡其力此聖母冲人之本意而天下有識之所望也昔唐太宗以干戈之事尚能起李靖於既老而穆宗文宗

以燕安之際不能用裴度於未病治亂之效於斯可見
朕意如此卿其少安

賜宰臣呂公著乞外任不允批答 蘇軾

夫以才御物才有盡而物無窮以道應物道無窮而物
有盡凡今之患所乏非才以卿篤於愛君必能建長久
之策澹然無我可以寄枉直之權二年于茲百度惟正
事既就緒民亦小康至於微疾之屢攻亦高年之常理
卿其良食自輔為國少安譬如止水之在盤豈復勞心

於鑒物心且不勞而況於力乎

賜宰臣呂公著乞致仕不允批答 蘇軾

宰相不自用人主不自為予欲識人物之忠邪故以卿
為水鏡予欲知利害之輕重故以卿為權衡苟明此心
雖老猶壯與其輕去軒冕獨善其身孰若優游廟堂兼
享其樂益敦此義勿復有云

賜司空呂公著免恩命不允批答 蘇軾

夫國以得人為彊如猛獸之衛菽藿以積賢為寶如珠

輔相之責苟無為國養人之意必有臨事乏使之憂朕
用慨然當食不御思得英雋之老共收文武之用惟卿
篤於憂國明於知人灼見朕心宜在此位往任天下之
重毋事匹夫之廉

賜門下侍郎侍固乞致仕不許批答

蘇軾

吾不出帷幄臨御家邦實賴股肱之良以持綱紀之要
於其進退顧可輕聽之哉卿頃自近藩擢貳東省本以

年德之故非有筋力之求若夫正顏色出詞氣使人望之而忠誠可信鄙倍自遠斯可矣豈可一病未能造朝遂欲舍而去哉誠請雖勤於義未也

賜劉昌祚免恩命不允批答

蘇軾

卿國之虎臣帥我爪士總章大祀宿衛有勞宜為六軍之先以承大賚之慶辭而不有殊匪吾心

宋文鑑卷三十三